

PANDUAN UNDANG-UNDANG : HAK UNTUK BERHIMPUN

1. APABILA DIBERHENTIKAN POLIS

1.1 Tidak Berpakaian Seragam, Minta Pengenalan Diri

Jika beliau tidak berpakaian seragam, minta beliau tunjukkan pengenalan diri. Katakan; “Sila tunjukkan Kad Kuasa Polis anda.”

1.2 Kad Kuasa Polis

Merah : Pegawai Polis yang digantung tugas. Beliau tiada kuasa untuk melakukan apa-apa terhadap anda.

Anda boleh berlalu dari situ.

Lain-lain Warna :

- Biru : Berpangkat Inspektor dan ke atas.
- Kuning : Berpangkat lebih rendah daripada Inspektor.
- Putih : Polis Simpanan

Ambil perhatian nama dan nombor Kad Kuasanya.

1.3 Berpakaian seragam

Ambil perhatian nama dan nombor ID pada pakaian seragamnya.

1.4 Kenderaan Peronda Polis

Ambil perhatian nombor pendaftaran kereta atau motosikal peronda

berkenaan.

2. POLIS MENYOAL SIASAT ANDA SEMASA DIBERHENTIKAN

2.1 Pengenalan Diri

Hanya berikan nama, nombor kad pengenalan dan alamat anda.

2.2 Polis bertanyakan soalan-soalan lain

Tanya dengan sopan, "Adakah saya sedang ditangkap?"

2.3 Adakah anda sedang ditangkap

Anda sedang ditangkap jika Polis:

- menjawab "ya";
- tidak membenarkan anda berlalu/mahu membawa anda ke Balai Polis; atau
- menggari anda.

Jika anda tidak ditangkap, anda boleh berlalu/menolak untuk mengikutnya ke Balai Polis atau ke mana sahaja, jika diminta.

3. POLIS MENANGKAP ANDA

3.1 Tanya: "Mengapa saya ditangkap?"

Sesuatu tangkapan menjadi tidak sah jika anda tidak diberitahu alasan tangkapan.

3.2 Ambil butiran polis yang menangkap anda

Semasa ditangkap, ambil butir-butir nama polis yang menangkap anda seperti nama, nombor pengenalan polis. Jika polis itu berpakaian biasa, dapatkan nama polis tersebut.

3.3 Jangan melawan semasa ditangkap

Polis mempunyai hak untuk menggunakan kekerasan yang munasabah semasa menangkap anda jika anda melawan. Walaubagaimanapun, kekerasan yang digunakan mestilah seminimum mungkin, cukup setakat untuk menangkap. Polis tiada hak untuk memukul dan bertindak ganas terhadap anda.

3.4 Polis tidak boleh merampas barang peribadi semasa tangkapan

Polis tidak boleh merampas barang peribadi anda seperti dompet dan telefon bimbit semasa tangkapan. Barang-barang ini hanya boleh diambil apabila anda dihantar ke lokap untuk tahanan di mana barang-barang ini perlu direkodkan terlebih dahulu dalam Borang Senarai Rampasan.

3.5 Tanya: "Balai Polis manakah saya akan dibawa?"

Pegawai Polis yang menjalankan tangkapan mestilah dengan segera membawa anda ke Balai Polis yang berdekatan dan bukan sebaliknya.

3.6 Apa yang perlu anda lakukan apabila ditangkap

Anda mempunyai hak untuk membuat satu panggilan telefon kepada:

1. Keluarga atau rakan; dan/atau
2. Seorang peguam.

Anda juga boleh menghubungi Pusat Bantuan Guaman (LAC).

Maklumkan kepada mereka:

- yang anda telah ditangkap;
- masa, tempat dan alasan ditangkap;
- Balai Polis di mana anda dibawa.

3.7 Apa yang akan berlaku selepas ditangkap

Anda boleh ditahan sehingga 24 jam:

- Di Balai Polis, atau
- Di dalam lokap untuk "membantu" penyiasatan Polis.

4. HAK ANDA SELEPAS DITANGKAP DAN SEMASA DALAM TAHANAN

4.1 Hak untuk berunding dengan seorang peguam

Sebaik sahaja anda meminta kehadiran seorang peguam, anda mempunyai hak untuk berunding dengan peguam berkenaan di Balai Polis. Pihak Polis mestilah memberikan kemudahan-kemudahan yang munasabah dan masa yang munasabah untuk anda berjumpa dan berbincang dengan peguam berkenaan. Pihak Polis bagaimanapun boleh menafikan hak ini, jika kelengahan dalam menyoalsiasat anda boleh menyebabkan berlakunya jenayah lain atau menyebabkan bahaya kepada pihak lain (**Artikel 5(3) Perlembagaan Persekutuan dan seksyen 28A Kanun Acara Jenayah**).

4.2 Pakaian

Anda dibenarkan mempunyai satu set pakaian bersama anda semasa di dalam lokap.

4.3 Barangan peribadi

Pihak Polis mestilah merekodkan semua barangan peribadi anda dan meletakkannya dalam simpanan selamat. Barangan peribadi anda mesti dipulangkan kepada anda sebaik sahaja dibebaskan.

4.4 Kebajikan

Anda dibenarkan mandi dua kali sehari. Jika anda jatuh sakit, anda berhak mendapat rawatan perubatan dengan serta-merta. Anda sepatutnya diberikan makanan dan minuman yang wajar dan secukupnya semasa dalam tahanan.

4.5 Berapa lamakah pihak Polis boleh menahan anda

Pihak Polis hanya boleh menahan anda sehingga 24 jam untuk siasatan. Tugas Polis adalah untuk menyelesaikan penyiasatan dalam masa 24 jam dan melepaskan anda dengan segera. Jika pihak Polis tidak dapat menyelesaikan penyiasatan dalam tempoh 24 jam, Polis mesti membawa anda ke hadapan seorang Majistret untuk mendapatkan perintah reman untuk memanjangkan tempoh penahanan anda melebihi 24 jam (Perintah Reman).

5. SOAL SIASAT OLEH PIHAK POLIS

5.1 Kenal pasti Pegawai Polis yang menyoal siasat anda

Ambil perhatian nama/pangkat Pegawai Polis yang menyoal siasat anda.

5.2 Hak anda untuk berdiam diri

Polis lazimnya akan beramah mesra terlebih dahulu (contohnya: bertanya tentang keluarga dan rakan-rakan anda dll.) Anda hanya perlu memberikan nama penuh, umur, alamat dan pekerjaan anda (Maklumat-Maklumat Peribadi). Selain Maklumat-Maklumat Peribadi, anda berhak memilih untuk berdiam diri. Anda harus bersopan. Anda tidak perlu takut untuk berdiam diri. Ini adalah hak anda. Jika anda memilih untuk berdiam diri, katakan, "Saya ingin menggunakan hak saya untuk berdiam diri."

5.3 Pernyataan 112 anda semasa dalam penyiasatan

Pihak Polis akan bertanya soalan-soalan kepada anda dan kemudian mencatatkan semua jawapan anda. Polis tidak boleh mengugut atau memaksa anda untuk memberi Pernyataan. Jika anda diugut, dipukul atau dipaksa, buat satu laporan Polis terhadap Pegawai Polis berkenaan dengan segera. Ini adalah hak anda.

5.4 Membuat Pernyataan 112

Semasa membuat Pernyataan 112, anda boleh menolak untuk menjawab mana-mana soalan/berdiam diri jika jawapannya mungkin mendedahkan anda kepada kesalahan jenayah (seksyen 112(2) Kanun Acara Jenayah).

- **Contohnya anda boleh berkata “saya menggunakan hak berdiam diri di bawah seksyen 112(2)”**
Atau
- **“Saya menggunakan hak berdiam diri dan akan menjawab di mahkamah”.**

Elakkan bersembang-sembang kosong dengan polis, fokus dengan jawapan yang diberikan kepada soalan-soalan yang ditanya.

5.5 Menandatangani Pernyataan 112 anda

Sebelum menandatangani Pernyataan anda, baca dengan teliti semua soalan dan jawapan anda yang ditulis oleh Pegawai Polis yang berkenaan.

- Anda berhak membuat pembetulan/pindaan ke atas Pernyataan tersebut sebelum ditandatangani.
- Turunkan tandatangan betul-betul di bawah ayat terakhir Pernyataan anda.

Polis hanya boleh mengambil keterangan anda di bawah seksyen 112 di mana anda berhak untuk berdiam diri dan hanya memberikan butir-butir diri seperti nama, alamat dan nombor kad pengenalan sahaja.

Polis tidak berhak mengambil keterangan atau sebarang maklumat yang tidak berkaitan daripada anda selain dari keterangan di bawah seksyen 112.

6. PERINTAH REMAN OLEH MAJISTRET SELEPAS 24 JAM

6.1 Siapakah Majistret

Majistret ialah seorang pegawai kehakiman yang mempunyai kuasa untuk membuat Perintah Reman bagi menahan anda lebih daripada 24 jam.

6.2 Tujuan Perintah Reman

Untuk memberi lebih masa kepada Polis untuk melengkapkan penyiasatan dan memutuskan sama ada terdapat bukti untuk mendakwa anda atas satu-satu kesalahan. Pihak Polis tidak boleh memohon Perintah Reman hanya untuk mengambil Pernyataan daripada anda.

Polis tidak boleh menahan anda lebih dari 24 jam tanpa dibawa ke hadapan seorang Majistret untuk mendapatkan perintah reman (**Artikel 5(4) Perlembagaan Persekutuan, seksyen 117 Kanun Acara Jenayah**)

6.3 Berapa lamakah Perintah Reman

Apabila pihak Polis membawa anda ke hadapan seorang Majistret untuk memohon Perintah Reman, pihak Polis perlu memberikan alasan kepada Majistret mengapa anda perlu ditahan melebihi 24 jam. Tugas Majistret adalah untuk menimbang-nimbang secara berhati-hati alasan-alasan yang diberikan oleh pihak Polis. Majistret berkenaan mempunyai budi bicara:

- untuk tidak membenarkan Perintah Reman dan seterusnya melepaskan anda; atau
- membenarkan Perintah Reman untuk satu tempoh yang lebih pendek daripada yang dipohon oleh pihak Polis. Seorang Majistret mempunyai kuasa untuk membenarkan Perintah Reman tidak melebihi 4 hari atau 7 hari bergantung kepada jenis kesalahan yang sedang disiasat. Pihak Polis boleh memohon Perintah Reman kedua selepas tamatnya Perintah Reman pertama. Majistret boleh membenarkan Perintah Reman kedua untuk tempoh tidak melebihi 3 hari atau 7 hari bergantung kepada jenis kesalahan yang sedang disiasat.

6.4 Apa yang perlu anda katakan ketika anda dibawa di hadapan seorang Majistret untuk proses reman

Maklumkan kepada Majistret:

- anda mahu diwakili oleh seorang peguam dan anda mahu menghubungi peguam, pusat bantuan guaman dan keluarga anda;
- jika anda mahukan rawatan perubatan kerana anda sakit atau telah dipukul;
- jika pihak Polis telah mengugut atau memukul anda semasa dalam tahanan;
- jika anda telah tidak diberikan makanan/minuman/pakaian atau perubatan yang wajar dan mencukupi semasa dalam tahanan;
- sama ada pernah ditahan sebaik sebelum penahanan terkini anda;
- sama ada pihak Polis telah menjalankan apa-apa penyiasatan semasa anda dalam tahanan.

6.5 Mohon supaya Majistret memberikan Perintah Reman yang singkat

Sebelum Majistret berkenaan membuat Perintah Reman, mohon agar perintah reman tidak diberikan atau mohon tempoh reman yang lebih singkat daripada yang dipohon oleh pihak Polis. Beri alasan (sebagai contohnya: "saya akan bekerjasama dengan polis dalam siasatan mereka", "saya boleh dihubungi bila-bila masa dan tidak akan melarikan diri" dll).

7.0 PENDAKWAAN

7.1 Polis boleh mendakwa anda di bawah:-

- Akta Polis 1967-Perhimpunan Tanpa Permit
- Seksyen 122 Kanun Keseksaan-Pengisytiharan Perang terhadap Yang Dipertuan Agong
- Kanun Keseksaan-Menyertai Perhimpunan Haram dan Rusuhan
- Akta Hasutan 1948
- Akta Keselamatan Dalam Negeri 1960
- Akta Percetakan dan Penerbitan 1986
- Akta Universiti dan Kolej Universiti 1971

7.2 Jangan mengaku salah atas pendakwaan

Anda dinasihatkan untuk tidak mengaku salah di Mahkamah apabila pendakwaan dibacakan, dan pohon untuk dibicarakan.

8.0 Jamin

8.1 Setelah dibacakan pertuduhan di Mahkamah dan anda mengaku tidak bersalah, anda berhak dilepaskan dengan ikat jamin yang akan ditetapkan oleh Mahkamah (seksyen 29 Kanun Acara Jenayah)

8.2 Sebelum Mahkamah menetapkan ikat jamin, nyatakan beberapa faktor untuk mengurangkan ikat jamin seperti:-

- anda adalah penyara keluarga
- bilangan ahli keluarga di bawah jagaan anda
- umur anak-anak anda
- anak-anak yang masih kecil/bersekolah
- pendapatan anda